



SOGFBiH

SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XIII

BROJ: 214

DATUM: 04.03.2016.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Održana sjednica Komisije za lokalnu samoupravu Predstavničkog doma Parlamenta Federacije BiH

Općina Novi Grad Sarajevo domaćin privrednog skupa "Lokalno partnerstvo za ekonomski razvoj"

Bosanska Krupa će i dalje raditi na poboljšanju procedura za poslovanje

Pokretači ekonomije: Tešanjci imaju pametna rješenja za pametan biznis

Svečano pušten u funkciju sistem video nadzora gradskog jezgra Kaknja

Najava Konferencije vodene usluge—od izazova do mogućnosti

Javni poziv jedinicama lokalne samouprave u BiH za podnošenje prijave za učešće u implementaciji projekta "Lokalni integrirani razvoj"

Najava Kongresa vijeća evropskih općina i regija (CEMR)

Najava obilježavanja dana općina i gradova za mjesec mart/ ožujak

Bilten Saveza općina i gradova Federacije Bosne i Hercegovine

ODRŽANA SJEDNICA KOMISIJE ZA LOKALNU SAMOUPRAVU PREDSTAVNIČKOG DOMA PARLAMENTA FBiH

U Maloj sali Gradskog vijeća Grada Sarajeva, 22. februara je održana sjednica Komisije za lokalnu samoupravu Predstavničkog doma Parlamenta Federacije Bosne i Hercegovine. Pored članova Komisije, ispred Saveza općina i gradova FBiH prisustvovali su Vesna Travljanin, direktorica Saveza i Selma Fišek, viši saradnik za pravna pitanja.

Komisija je, u okviru dnevnog reda razmatrala i podržala Prijedlog zakona o finansiranju poslova premjera i uspostavljanja katastra nekretnina. Predstavnici Saveza su istakli da Savez ostaje pri svom ranijem stavu da se ne slaže sa donošenjem Zakona o finansiranju poslova premjera i uspostavljanja katastra nekretnina prije usvajanja Zakona o premjeru i registraciji nekretnina. Također, Komisija je razmatrala Rezoluciju Skupštine Saveza općina i gradova FBiH koja je donesena 21. oktobra/listopada 2015. godine. Direktorica Saveza, gđa Travljanin upoznala je članove Komisije sa sadržajem i razlozima donošenja iste, u okviru čega je naglasila nužnost donošenja zakona koji su u interesu jedinica lokalne samouprave.

Pored ovoga, direktorica Saveza je informisala Komisiju o održanoj Konferenciji predsjedavajućih i sekretara općinskih vlasti u Federaciji BiH, koja je održana 4. decembra/prosinca prošle godine u Sarajevu, a organizovana u sklopu projekta „Podrška savezima općina i gradova“. Komisija je jednoglasno podržala Rezoluciju, kao i Strategiju razvoja Saveza i predložila izradu Nacrta Sporazuma o saradnji Parlamenta Federacije BiH i Saveza općina i gradova FBiH.



OPĆINA NOVI GRAD SARAJEVO DOMAĆIN PRIVREDNOG SKUPA "LOKALNO PARTNERSTVO ZA EKONOMSKI RAZVOJ"



Općina Novi Grad Sarajevo je 24. februara organizirala skup pod nazivom „Lokalno partnerstvo za ekonomski razvoj“, koji je na jednom mjestu okupio više od dvije stotine predstavnika privrednih subjekata koji djeluju na području ove lokalne zajednice. Skupu je bila prisutna i direktorica Saveza općina i gradova Federacije BiH Vesna Travljanin. Bila je to prilika da se analiziraju rezultati programa mjera podsticaja privredi i zapošljavanju koje je ova sarajevska općina provela u protekle tri godine s ciljem očuvanja postojećih radnih mjesta i

otvaranja novih, razmjene iskustva, ali i da se čuje riječ privrednika.

Gledajte Savez općina i gradova
Federacije Bosne i Hercegovine na



Kako je istakao Džemaludin Kahrović, pomoćnik načelnika Općine Novi Grad Sarajevo za privredu i lokalni ekonomski razvoj strateški cilj Općine je konkurentna privreda koja će generirati nova, kvalitetna radna mjesta na području ove lokalne zajednice, te da je strateško opredjeljenje definisano „Programom pokrenimo Novi Grad zajedno“ da 5 posto sredstava iz budžeta bude usmjereno u podsticaj privredi. Ovakav način pružanja podrške privredi rezultirao je značajnim povećanje broja novih radnih mjesta (3.069), tako da je udio Općine u ukupnom trendu rasta zaposlenosti u FBiH (13.237) 23 posto u protekle tri godine. Tokom susreta je rečeno da u budućnosti jedna od mjera podrške privredi, treba biti podsticaj razvoju obrta, te da će se u narednom periodu aktivnije raditi na prekvalifikaciji radne snage, kako bi ona bila konkurentnija na tržištu rada.

Također, prezentirani su i podaci o stanju privrede na području općine Novi Grad u protekle četiri godine. Na današnjem skupu prisutnima je predstavljen i Poslovni savjet Općine Novi Grad Sarajevo, kojeg čine istaknuti privrednici, koji žive i djeluju na području Novog Grada.

Potpredsjednik poslovnog Savjeta Općine Novi Grad Erdal Trhulj prezentirao je stanje privrede u Novom Gradu. U svom izlaganju Trhulj je kazao da je u Novom Gradu aktivno 1.439 firmi, a da je ukupno registrirano 500 obrta. Istakao je da ovih 1.439 kompanija s područja Novog Grada učestvuju u cijelom prihodu u FBiH sa gotovo 3,5 milijarde KM. Trhulj se osvrnuo na rast izvoza u 2014. godini koji je u porastu za čak 31,6 posto u odnosu na 2012. godinu.

U sklopu ovog događaja, načelnik Semir Efendić i direktor BBI banke Amer Bukvić potpisali su ugovor za formiranje povoljne finansijske linije za privredne subjekte koji posluju na području Novog Grada. Ukupan iznos sredstava koje je BBI banka ponudila ove godine iznosi 10 miliona maraka, a 300.000 KM iz budžeta Općine ići će za sufinansiranje profitne stope, tako da će ona iznositi od 0,49 do 2,99 posto.

BOSANSKA KRUPA ĆE I DALJE RADITI NA POBOLJŠANJU PROCEDURE ZA POSLOVANJE

U povodu dobivanja certifikata za povoljno poslovno okruženje BFC (Business Friendly Certification) u Općini Bosanska Krupa je 29. februara održana konferencija na kojoj je istaknuto da je Općina u posljednjih godinu dana uradila dosta što se tiče internih procedura. "Ažurirali smo vodiče za dobijanje građevinskih i dozvola za rad. Uradili smo baze podataka poslovnih prostora i zemljišta u vlasništvu Općine koje možemo staviti na raspolaganje potencijalnim investitorima, završili smo analizu poslovnog okruženja,



anketiranje poslovnih subjekata kako bismo dobili smjernice za budući rad i lokalne uprave i inicijative koje bismo trebali poduzeti da poboljšamo poslovno okruženje. Poboljšali smo rad Privrednog savjeta koji je kroz ovaj proces intenzivirao svoj rad, uradili smo akcioni plan zapošljavanja, kompletan promotivni materijal, izvršili redizajn naše internet stranice i istu obogatili sa svim zahtjevima, dokumentima bitnim za zainteresirane ulagače", istakla je referentica za lokalni razvoj u Općini Bosanska Krupa Esma Hergić.

Na putu do BFC certifikata općine trebaju ispuniti 12 kriterija i više od 80 podkriterija koji podrazumijevaju unapređenje procedura, jačanje transparentnosti, smanjivanje birokratije i pribavljanje svih dokumenata i podataka neophodnih privrednicima i potencijalnim ulagačima u planiranju poslovanja i donošenju investicionih odluka.

U posljednjih godinu dana mi smo mnogo toga uradili što se tiče internih procedura u Općini Bosanska Krupa. Ažurirali smo vodiče za dobijanje građevinskih i dozvola za rad. Uradili smo baze podataka poslovnih prostora i zemljišta u vlasništvu Općine koje možemo staviti na raspolaganje potencijalnim investitorima, završili smo analizu poslovnog okruženja, anketiranje poslovnih subjekata kako bismo dobili smjernice za budući rad i lokalne uprave i inicijative koje bismo trebali poduzeti da poboljšamo poslovno okruženje. Poboljšali smo rad Privrednog savjeta koji je kroz ovaj proces intenzivirao svoj rad, uradili smo akcioni plan zapošljavanja, kompletan promotivni materijal, izvršili redizajn naše internet stranice i istu obogatili sa svim zahtjevima, dokumentima bitnim za zainteresirane ulagače", istakla je Hergić.

"Programom pokrenimo Novi Grad zajedno, da 5 posto sredstava iz budžeta su usmjerena na podsticaj privredi. Ovakav način pružanja podrške privredi rezultirao je značajnim povećanjem broja novih radnih mjesta."

*Džemaludin Kahrović,
pomoćnik načelnika
Općine Novi Grad
Sarajevo.*



Grb Općine Bosanska Krupa

Program predstavlja instrument koji omogućava ocjenu kvaliteta lokalnih zajednica u pogledu investicijskih potencijala, infrastrukture, usluga i informacija koje nude potencijalnim investitorima i postojećem gospodarstvu.

„Prije svega se želim zahvaliti svim radnicima organa uprave, privrednicima, vijećnicima koji su učestvovali u ovom procesu koji sigurno stvara novu dimenziju u poslovnom ambijentu u Bosanskoj Krupi. Mi smo posljednjih godina uradili zaista puno reformi lokalne uprave u smislu smanjenja birokratije, smanjenja rokova za izdavanje dozvola itd. Sa ovim certifikatom stavljamo tačku na jedan taj proces. Ono što nam predstoji jeste da ove standarde koje smo imali zadržimo, a ono što nam je falilo da kreiramo i unaprijedimo. BiH je poznata po lošem birokratskom aparatu, mi smo se evo uspjeli izdici iz prosjeka, sivila. Naravno, još uvijek trebamo puno raditi, još skratiti rokove, ubrzati aktivnosti, jednostavno biti spremni za investitore, u smislu da imamo pripremljeno građevinsko zemljište sa potrebnom infratrukturom. Samo tako možemo privući investitore i smanjiti broj nezaposlenih, na koncu odlazak mladih ljudi iz naše zemlje“ naglasio je načelnik Općine Armin Halitović.

BFC SEE program provodi Regionalni savjet za povoljno poslovno okruženje i partnerske organizacije iz četiriju država - Ministarstvo za ekonomske odnose i regionalnu saradnju Republike Srpske, Privredna komora RS-a, Federalno ministarstvo razvoja, poduzetništva i obrta BiH, Regionalna razvojna agencija Hercegovine (REDAH), Centar za lokalni ekonomski razvoj (Hrvatska), Zajednica jedinica lokalnih samouprava Makedonije (ZELS), Savez makedonskih privrednih komora (MCC) i NALED (Srbija).

KORISNI LINKOVI ZA PREDPRISTUPNE FONDOWE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.facso.org
www.euoinfocentar.ba
www.balkanfund.org
www.eurelmed.com
www.eacea.ec.europa.eu

POKRETAČI EKONOMIJE: TEŠANJCI IMAJU PAMETNA RJEŠENJA ZA PAMETAN BIZNIS



TRA Agencija realizuje veći broj projekata koji su višegodišnji, a među kojima se ubrajaju: COBEAR - Konkurentnost sredine poslovne izvrsnosti, podizanje nasada maline i Programi obuke radne snage u Centru za obrazovanje odraslih Tešanj, kazao je u razgovoru za poslovni portal Akta.ba, direktor TRA Ismar Alagić.

TEHNIKE I ALATI

Kaže kako je poslovni konsalting usmjeren prema privatnom sektoru se fokusirao na tehnike i alate koji se koriste u oblasti dizajna, proizvodnje i ispitivanja proizvoda primjenjujući iskustva lidera u branši.

"Obuke iz oblasti rada sa kompjuterski upravljanim mašinama, potom radu sa 3D-CAD aplikacijama do metoda upravljanja proizvodnjom postali su sastavni dio usluga TRA Agencije za predstavnike poslovnog sektora. Područje poljoprivrede se sistematično podržava putem projekata iz oblasti jagodičastog voca, plasteničke proizvodnje, mljekarstva i razvoja lanaca vrijednosti u poljoprivrednoj proizvodnji", kaže Alagić, naglašavajući kako razvijaju kompetencije vlastitog

osoblja kroz osposobljavanje za vođenje infrastrukturnih projekata finansiranih od strane međunarodnih finansijskih institucija, potom napredne studije: razvoj liderstva i stručnih vještina u industriji namještaja i prerade drveta, preko efikasnog korištenja resursa i čistije proizvodnje do upravljanja projektnim ciklusom i strateško planiranje zasnovano na upravljanju ciljevima.

"Naši kadrovi su izrasli u regionalno prepoznatljive regionalne trenere i konsultante sa kojima sarađuju međunarodne organizacije. Koncept TRA poslovne škole je uveliko postao sastavni dio vremena u kojem živimo", ističe Alagić.

Izdavačka djelatnost više nije nepoznanica za TRA Agenciju i publikacije "Priručnik za CNC operatere" i "Izvozni vodič-posebni zahtjevi kupca" su rezultat vlastitog znanja i kompetencija oplemenjenih saradnjom sa njihovim partnerima.

"TRA Agencija prema svim svojim dionicima nudi 'pametna rješenja za pametan biznis'", ističe Alagić.

Rezultati koje često imamo priliku čuti putem sredstava javnog informisanja, na raznim skupovima govore da tešanjka privreda svaki dan bilježi sve bolje rezultate. Stoga i ne čude podaci da ekonomska razmjena privrede Tešnja sa svijetom je prošle godine iznosila 675.725.691,00 KM.



Grb Općine Tešanj

**IZVOZNI REZULTATI**

"Izvoz roba i usluga u iznosu od 340.967.637,00 KM na tržišta 61 države, uz uvoz roba i usluga u vrijednosti 334.758.054,00 KM iz 50 država dovodi nas do pokrivenosti izvoza sa uvozom u visini 101,85 posto. Imajući na umu da je promet tešanjskih firmi na godišnjem nivou od 1,5 milijardu KM dolazimo do podataka da tešanska privreda čini 3,7 posto izvoza iz BiH. Broj zaposlenih je na najvišem nivou u posljednje vrijeme i za 56 posto je veći u odnosu na period iz 1991. godine, dok se broj zaposlenih kontinuirano smanjuje i nalazi se na najmanjem broju u posljednjih nekoliko godina. Tešanj možda nije pozicioniran na raskršnici puteva, ali zasigurno jeste na raskršnici biznisa", pojašnjava Alagić.

Navodi kako je pozitivan trgovinski saldo u ekonomskoj razmjeni roba sa najvećim brojem vodećih evropskih i svjetskih ekonomija govori u prilog da se metaloprerađivačka, drvoprerađivačka, prerada hrane uz prerađivačke djelatnosti u oblasti tekstila i kože razvijaju u pravcu kontinuiranog rasta i razvoja na području općine Tešanj. U isto vrijeme, kaže firme kojima su vlasnici preduzetnici iz Tešnja, a iste se nalaze raspoređene širom Bosne i Hercegovine su izvozno orijentisane i bilježe stalan rast poslovanja. "Ekonomski rast lokalne zajednice je najmanji zajednički imenitelj slijedeća četiri faktora: kadrovi – tehnologija-kapital-prirodni resursi. Razvoj tkz. netradicionalnih privrednih grana stalno u prvi plan istura liderstvo lokalne ekonomije koja se pozicionira "barem za korak ispred konkurencije", kaže Alagić, napominjući da su Tešnjaci ljudi koji se drže slogana: "što čujem zaboravim, što vidim zapamtim, a što uradim, to i ZNAM" ! geslom "pametna razvoj za budućnost".

Izvor: Akta.ba

"Promet tešanjskih firmi na godišnjem nivou je 1,5 milijardu KM, dolazimo do podataka da tešanska privreda čini 3,7 posto izvoza iz BiH. Broj zaposlenih je na najvišem nivou u posljednje vrijeme i za 56 posto je veći u odnosu na period iz 1991. godine." Ismar Alagić

SVEČANO PUŠTEN U FUNKCIJU SISTEM VIDEO NADZORA GRADSKOG JEZGRA KAKNJA

Utorak, 1. mart 2016. godine: U Policijskoj stanici Kakanj danas je upriličena svečanost puštanja u funkciju sistema video nadzora gradske jezgre Kakanja.

Simboličnim paljenjem monitora sistem su u funkciju pustili načelnik Općine Kakanj Nermin Mandra i policijski komesar ZDK Semir Šut. Video nadzorom su pokrivene lokacije na kojima se nalaze škole, saobraćajnice, vjerski objekti i brojni drugi lokaliteti.

Ukupna vrijednost projekta kojeg finansira Općina Kakanj iznosi 238.947,23 KM. Izvođač radova je Agencija „Kamir“ Široki Brijeg. Mjesta na kojima su postavljene kamere neće biti otkrivena kako bi se kamere sačuvala od eventualnog oštećenja, ali je posve jasno da ih ima svuda. Radi se o visokosofisticiranim kamerama i opremi koja omogućava da se vidi apsolutne sve što se dešava na području nadzora, uz mogućnost vraćanja snimaka, približavanja i drugih opcija koje su potrebne kako bi se izvršila identifikacija osoba ili vozila.

Realizacija ovog projekta se nastavlja tako da će u konačnici video nadzorom biti pokrivene brojne lokacije van gradske jezgre na potezu od Kraljeve Sutjeske do Bilješeva.

„Uvođenje sistema video nadzora je dio općih nastojanja da se u našoj lokalnoj zajednici kvaliteta života podigne na veći stepen. Ovaj projekat je rezultat uvažavanja mišljenja i sugestija građana Kakanja sa kojima se općinske službe kontinuirano konsultiraju putem alata dvosmjernе komunikacije sa ciljem adekvatnog definiranja prioriteta.

Video nadzor će poboljšati opću sigurnosnu situaciju u Kakanju sa aspekta sprečavanja krivičnih djela i otkrivanja počinitelja, te će rezultirati povećanjem stepena poštivanja Odluke o komunalnom redu u smislu sprečavanja i sankcionisanja u slučajevima bacanja smeća na javne površine, uništavanja gradskog zelenila i mobilijara i drugih nedozvoljenih radnji koje čini nesavjesni pojedinci.

Ovaj projekat znači još jedan korak bliže našoj viziji Kakanja kao malog savremeno i moderno uređenog grada kakve možemo vidjeti u razvijenim evropskim zemljama.

Projekat uspostave video nadzora se odnosi i na vangradska područja što govori o našim nastojanjima da se kompletno područje Kakanja što više urbanizira i infrastrukturno ojača", rekao je načelnik Mandra.



Grb Općine Kakanj

NAJAVA KONFERENCIJE VODNE USLUGE - OD IZAZOVA DO MOGUĆNOSTI



Jednodnevna konferencija pod nazivom „VODNE USLUGE - OD IZAZOVA DO MOGUĆNOSTI“, održat će se 30. marta/ožujka 2016. godine u hotelu „Zenica“ u Zenici. Konferencijom se želi dati naglasak na potrebu jačanja ljudskih i institucionalnih kapaciteta i unaprjeđenja upravljanja u oblasti vodosnabdijevanja i odvodnje otpadnih voda.

Konferenciju zajedno organiziraju Udruženje za oblasti voda i zaštite okoliša „Aquasan mreža u BiH“, Udruženje

„Vodovodi Republike Srpske“ i Udruženje poslodavaca komunalne privrede Federacije BiH, uz podršku Ministarstva vanjske trgovine i ekonomskih odnosa u BiH i Ministarstva za građenje, prostorno uređenje i zaštitu okoliša Unsko - sanskog kantona.

Za sva dodatna pitanja i informacije kontaktirati se može putem telefona + 387 37 224 038 ili putem e-maila info@aquasanbih.ba. Za više informacija pogledajte najavu konferencije [OVDJE](#)

JAVNI POZIV JEDINICAMA LOKALNE SAMOUPRAVE U BOSNI I HERCEGOVINI ZA
PODNOŠENJE PRIJAVA ZA UČEŠĆE U IMPLEMENTACIJI PROJEKTA „LOKALNI
INTEGRISANI RAZVOJ“

Projekat "Lokalni integrisani razvoj", koji je započeo sa radom u januaru tekuće godine objavljuje Javni poziv jedinicama lokalne samouprave za iskazivanje interesa za učešće u implementaciji projekta. Kroz ovaj projekat, odabranim jedinicama lokalne samouprave (do 20) će biti pružena podrška u izradi lokalnih razvojnih strategija, jačanju kapaciteta za upravljanje razvojem, uspostavljanju i jačanju partnerstava javnog, privatnog i nevladinog sektora, realizaciji prioriteta koji proizilaze iz lokalnih strategija te praćenju razvojnih efekata. Osim toga, projekat će u odabranim jedinicama lokalne samouprave pružiti podršku razvoju mikro, malih i srednjih preduzeća kao i seoskih domaćinstava, doprinoseći konkurentnosti lokalnih ekonomija i stvaranju mogućnosti za zapošljavanje. Rok za dostavljanje prijava je 14. mart/ožujak 2016. godine.

Za više informacija i način prijave pogledajte:

1. [Javni poziv za odabir partnerskih jedinica lokalne samouprave sa smjernicama za prijavu;](#)
2. [Sažetak projekta;](#)
3. [Spisak prioriteta jedinica lokalne samouprave;](#)
4. Prijavni obrazac;
5. Urnek pisma namjere.

KORISNI LINKOVI ZA
PREDPRISTUPNE FONDVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euinfocentar.ba
www.balkanfund.org
www.eurelmed.com
www.eacea.ec.europa.eu

NAJAVA KONGRESA VIJEĆA EVROPSKIH OPĆINA I REGIJA (CEMR)



CEMR Congress 2016
20/22 April - Nicosia

Kongresa Vijeća evropskih općina i regija (CEMR) će se održati u Nikoziji (Kipar), od 20. do 22. aprila.

CEMR kongres je mjesto susreta za stotine načelnika, gradonačelnika, vijećnika, kao i drugih lidera lokalne samouprave u Evropi i šire. Kongres ima za cilj razmijenu informacija i dobrih praksi. Na kongresu će se govoriti o aktuelnim temama i izazovima sa kojima se susreće lokalna

samouprava danas, a to su: migracija, klimatske promjene, lokalne finansije, reforme i sl. Kongresu će se obratiti lideri EU, predstavnici UN-a, stručnjaci iz raznih oblasti i drugi. Više informacija potražite na www.cemr2016.eu.



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova Federacije Bosne i Hercegovine na

YouTube

Pratite Savez općina i gradova FBiH na



facebook
Savez općina i gradova Federacije
Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu proslijedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA I GRADOVA ZA MJESEC MART/ OŽUJAK

Dan Općine Hadžići- 06. mart/ožujak. Ovaj dan se obilježava kao znak sjećanja na 6. mart 1996. godine, kada je izvršena reintegracija dijelova općine Hadžići koji su bili okupirani tokom agresije na Bosnu i Hercegovinu. Hadžići, Binježevo, Žunovnica, Grivići i Drozgozmetva su naselja koja su 6. marta 1996. godine predana legalnim vlastima Općine Hadžići

Dan Općine Doboј Istok- 10. mart/ožujak. Na ovaj dan 1998. godine Parlament Federacije BiH donio je odluku o osnivanju općine Doboј Istok.

Dan Općine Teočak- 10. mart/ožujak. Ovaj datum je izabran jer je na taj dan 1998. godine stupio na snagu Zakon o konstituisanju novih općina u FBiH

Dan Općine Ilidža- 12. mart/ožujak. Na ovaj datum je realizovana odluka Dejtonskog mirovnog sporazuma, gdje je došlo do reintegracije područja općine Ilidža.

Dan Općine Dobretići- 15. mart/ožujak. Na ovaj datum Parlament Federacije BiH formirao je Općinu Dobretići

Dan Općine Trnovo- 17. mart/ožujak. Na ovaj dan izvršena je reintegracije područja općine Trnovo 1996. godine.

Dan Općine Fojnica- 18. mart/ožujak. Ovaj datum je uzet za obilježavanje Dana Općine jer se u dokumentima dubrovačkih trgovaca na taj dan 1365. godine prvi put spominje grad Fojnica

Dan Općine Sapna- 18. mart/ožujak. Ovaj dan je uzet za obilježavanje Dana Općine zato što je tog dana 1998. godine održana prva sjednica Općinskog vijeća novoformirane Općine Sapna.

Dan Općine Foča FBiH- 19. mart/ožujak. Na ovaj dan izvršena je reintegracije područja općine 1996. godine.

Dan Grada Zenica- 20. mart/ožujak. Na taj dan 1436. godine Zenica je prvi put spomenuta u dokumentu kojim se dubrovačkim trgovcima omogućava slobodno kretanje i poslovanje na području Bosne.

